

四庫全書

經部

欽定四庫全書

詩緝卷八

宋嚴粲撰

鄭

國風

譜曰初宣王封母弟友於宗周畿內咸林之地是為鄭桓公今京兆鄭縣是其都也為幽王太司徒甚得周衆與東土之人問於史伯曰王室多故余懼及焉其何所可以逃死史伯曰其濟洛河潁之間乎是其子男之國號鄆為大號叔恃勢鄆仲恃險皆有驕侈怠慢之心加以貪冒君若以周難之故寄帑與賄不敢不許是驕而貪必將背君君以成周之衆奉辭伐罪無不克矣若克二邑鄆敝補丹依疇歷華君之土也修典刑以守之

惟是可以少固桓公從之後三年幽王為大戎所殺桓公死之其子武公與晉文侯定平王於東都王城卒取史伯所云十邑之地右洛左濟前華後河食漆洧焉今河南新鄭是也武公又作卿士國人宜之鄭之變風又作○疏曰謂濟西洛東河南潁北八國皆在四水之間若克號鄆二邑則其餘八邑自然可滅食謂居其土而食其水也對上鄆風已作故云又作○朱氏曰鄭桓公食於西都畿內之鄭邑今華之鄭是也其後又得號鄆之地施舊號於新邑則今鄭是也又曰鄭聲之淫有甚於衛矣故夫子論為邦獨以鄭聲為戒蓋舉重而言也○程子曰廢法失道則王畿之內亦不能保鄭本畿內之封因周之衰遂自為列國故次以鄭○前漢地理志曰鄭俗淫季札聞鄭之歌曰美哉其細已甚民弗堪也是其先亡乎自武公後二十三世為韓所滅

魏文侯聽鄭衛之音則不知倦蓋鄭衛皆淫風而鄭

尤甚

緇衣

緇音資

美武公也

疏曰武公掘突桓公友子素隱曰名滑突滑一作掘音鵲

父子

竝為周司徒

疏曰父謂武公父桓公友

善於其職國人宜之

朱氏曰周人作

是詩。詩記曰若鄭人所作何為三章皆言適子之館

故美其德以明有國善善

之功焉

曰鄭武公詩平王時。詩記曰好賢如緇衣所謂賢即武公父子也。講師誤以為武公好賢遂

曰有國善善之功焉失其旨矣

說者多以此詩為鄭人所作謂周人之詩當在王風非也破斧伐柯九罍狼跋皆周大夫所作而附於豳

此武公入為周司徒善於其職周人善之而作此詩
耳周人愛武公欲其常為卿士至其子莊公不克肖
其德周人遂畀號公政而緇衣之意替矣

緇衣之宜兮

傳曰緇黑色卿士聽朝之正服也。疏曰冬官鍾氏言染法三入為纁五入為緇七

入為緇注云染纁者三入而成又再染以黑則為緇又復再染以黑則成緇緇衣即士冠禮所云主人玄冠朝服緇帶素鞵是也諸侯與其臣服之以日視朝故禮通謂此服為朝服纁音熏緇音鄒。曹氏曰玉藻云天子皮弁以日視朝諸侯朝服以日視朝於內朝是天子常服之服用皮弁諸侯常服之服用羔裘玄冠也皮弁以白鹿皮為冠以狐白皮為裘以素錦為衣而裼之其上加朝服十五升白布為之衣冠同色故也羔裘以緇布

為冠以黑羊皮為裘以緇布為衣而裼之其上加朝服十五升緇布為之其裳皆素凡朝服君與卿大夫同今天子之卿而服緇衣者蓋既朝於天子而退治事則釋皮弁而服緇布衣以聽其所朝之政也裼音錫

予又改為兮

敝音弊本又作弊

適子之館兮

傳曰館舍也。李氏曰言諸侯各有

也館舍還予授子之粲兮

還音旋。王氏曰粲粟治之精者。朱氏曰漢有白粲之刑給

春導之役

武公之賢周人愛之故作此詩言武公為王卿士而服此緇衣也甚宜德稱其服也此衣若敝我周人當為子更為之願其久於位矣我適汝武公所寓之館

以其自鄭而至省問其舍止之安否也既見之而歸
我又取米之精者以遺之猶白飯青芻之意也士無
賢不肖入朝見疾武公以諸侯入為卿士宜周人之
所疾忌今稱譽之願望之親往省之又即饋遺之且
不以麤糲進也

糲二音辣厲

拳拳如此豈非好賢之至乎

○孔子云於緇衣見好賢之至

子孔叢

又云好賢如緇

衣惡惡如巷伯

禮記緇衣

緇衣之詩繾綣殷勤可謂好之

之至故曰好賢如緇衣巷伯之詩欲取讒人投畀豺

虎豺虎不食則投畀有北有北不受則投畀有昊可
謂惡之之至故曰惡惡如巷伯詩之好賢惡惡者多
矣獨舉二詩以其至者言之也

緇衣之好兮

傳曰好猶宜也

敝予又改造兮適子之館兮還予

授子之粢兮

緇衣之蓆兮

蓆音席。程子曰蓆舒安之義服稱其德則安舒。傳曰蓆大也

敝予又

改作兮適子之館兮還予授子之粢兮

緇衣三章章四句

將仲子

將音鏘

刺莊公也

疏曰莊公寤生武公掘突子

不勝其母

勝音升

以害其弟

疏曰弟名段字叔

弟叔失道而公弗制祭仲諫而公

弗聽

祭音再

小不忍以致大亂焉

曰鄭莊公詩平王時○左傳隱元年初鄭武公

娶于申曰武姜生莊公及共叔段莊公寤生驚姜氏遂惡之愛共叔段欲立之亟請於武公公弗許及莊公即位為之請制公曰制巖邑也號叔死焉他邑唯命請京使居之謂之京城大叔祭仲曰都城過百雉國之害也今京不度非制也君將不堪公曰姜氏欲之焉辟害對曰不如早為之所公曰多行不義必自斃子姑待之既而大叔命西鄙北鄙貳於己公子呂請除之公曰無庸將自及大叔又收貳以為己邑至於廩延子封曰可矣公曰不義不暱厚將崩大叔將襲鄭夫人將啓之公曰可矣命子封帥車二百乘以伐京京叛大叔段段入於

駢公伐諸駢大叔出奔共書曰鄭伯克段于鄆段不弟故不言弟如二君故曰克稱鄭伯譏失教也謂之鄭志
巫音罷大音泰駢音於晚於建於然三音共音恭子封
公子呂也○補傳曰將仲子之序與左氏合信乎詩序
經聖人之手而左氏之好惡與聖人同也○穀梁曰何
甚乎鄭伯甚鄭伯處心積慮成於殺也○公羊曰曷為
大鄭伯之惡母欲立之已殺之如勿與而已矣○胡氏
曰用兵大事也必君臣合謀而後動則當書國命公子
呂為主帥則當稱將出車二百乘則當稱師三者咸無
稱焉而專目鄭伯是罪之在伯也猶以為未足又書克
段于鄆克者力勝之辭不稱弟路人也于鄆操之為已
蹙矣姜氏當武公存之時嘗欲立段矣公既沒姜以國
君適母主乎內段以寵弟多才居乎外國人又悅而歸
之莊公恐其終將軋己為後患也故授之大邑而不為
之所縱使失道以至於亂然後以叛逆討之則國人不
敢從姜氏不敢主而大叔屬籍當絕不可使居父母之

邦此鄭
伯志也

莊公克段之事左氏以為譏失教此詩後序以為小不忍皆責之也輕穀梁公羊及胡氏深誅其心以為大惡後之說詩者祖其意以後序為非且謂詩人探莊公之心在於殺段而託諸父母諸兄國人以為說冀以稔成其惡耳竊謂此駁後序未盡莊公之惡則然而說詩之本意則未也叔段舊有奪嫡之謀莊公固以不能釋然于懷矣而又挾材武怙母寵結羣小

將不利於宗國此莊公之所深忌也請制弗許請京
與之迫於母意不得已焉耳始答祭仲曰多行不義
必自斃繼答公子呂曰無庸將自及至公子呂又言
之則曰不義不暱厚將崩蓋挾數用術為秋實黃落
之計設心不仁矣觀段之淺露為羣小所縱與而欲
謀宗國何能為者邪固易之矣及段將襲鄭公曰可
矣蓋幸其釁自彼作謂人不得以議我豈有涕泣而
道之之意哉公固非不忍者然春秋乃聖人褒貶之

法變風乃國人諷諫之辭不可以並論也此詩止以
公與祭仲有殺段之謀故設為公拒祭仲之辭以天
理感動之公論開悟之耳如此則不失詩人溫柔敦
厚之旨

將仲子兮

傳曰將請也仲子祭仲也○曹氏曰仲子祭仲足也祭其氏也名仲而字仲足

無踰

我里

傳曰踰越也里居也二十五家為里

無折我樹杞

疏曰杞柳屬○陸璣曰生水傍樹如

柳葉麤而白木理微赤其材堅韌今人以為車轂韌音

仞○今日樹杞猶言杞樹耳杞桑檀皆美木以喻兄弟

見○三杞考四牡

豈敢愛之畏我父母

疏曰於時其父亡與母連言之耳

仲可

懷也

念今曰懷也

父母之言亦可畏也

祭仲之謀迫而淺欲速去其偏曰早為之所莊公之
謀狡而深故養成其惡曰子姑待之公與祭仲皆欲
致段於死地所爭遲速之間耳公非拒祭仲也國人
知公與祭仲有殺段之謀乃反其意設為公拒祭仲
之辭以諷之謂公若曰請仲子無踰越我所居之里
無損折我美樹之杞喻無入我家而害我兄弟也我
豈敢愛段而私之哉乃畏我父母也仲子之言固可

念也然父母之言亦可畏也公未嘗有是言也而詩人代公言之若謂公之已踰者諷公縱不愛段獨不畏父母乎蓋譎諫也

將仲子兮無踰我牆無折我樹桑

呂氏曰孟子云樹牆下以桑則桑在牆下

也豈敢愛之畏我諸兄傳曰諸兄公族仲可懷也諸兄之言亦

可畏也

諷公縱不愛段獨不畏公族之義乎

將仲子兮無踰我園

傳曰園所以樹木也○疏曰園者園之藩故其內可以種木也無

折我樹檀

傳曰檀彊韌之木。疏曰檀材可以為車。陸璣曰檀木皮正青滑澤

豈敢愛

之畏人之多言仲可懷也人之多言亦可畏也

諷公縱不愛段獨不畏國人之多言乎

將仲子三章章八句

叔于田刺莊公也叔處於京

處音杵。曹氏曰滎陽故東虢國也有京水索水楚

漢戰於京索之間即其地也京邑在滎陽縣東教倉鴻溝在縣西官渡在中牟皆古戰爭處制即成皋舊虎牢

也索師古音繕甲治兵

繕音擅。箋曰繕之言善也甲鎧也鎧音慨韻又音愷。今曰

繕補也繕甲修治之意

以出于田國人說而歸之

說音悅。曰鄭莊公詩平王時

二叔于田皆美叔段之材武無一辭他及而首序以
為刺莊公蓋與春秋書鄭伯克段譏失教之意同首
序經聖人之手矣說詩不用首序則二叔于田皆為
美叔段椒聊為美桓叔叔段桓叔可美也乎哉此詩
言段出田而京邑之黨相媚說以從之耳後一謂國
人說而歸之非也鄭師臨其境京人亦叛之矣

叔于田

傳曰叔大叔叔段也田取禽也大音泰。箋曰于往也。

巷無居人

傳曰巷里塗也。疏

曰里內之途道也。

豈無居人不如叔也洵美且仁

洵音荀。箋曰洵信也。

段好田獵馳騁其黨諛說之謂叔之往田獵也人皆從之里巷之內無復居人豈盡無居人乎雖有居人但不如叔之信美且仁也段豈真美且仁哉其黨私之之言猶河朔之人謂安史為聖也詩人之意謂段之不令而羣小相與縱臾如此必為厲階以自禍莊公曷為不禁止之乎故序曰刺莊公也

叔于狩

音守。傳曰冬獵曰狩。

巷無飲酒豈無飲酒不如叔也洵

美且好

叔適野

箋曰適之也郊外曰野

巷無服馬

箋曰服馬猶乘馬。今曰易繫辭服牛乘馬

豈無服馬不如叔也洵美且武

曹氏曰言其有藝也

叔于田三章章五句

大叔于田

大如字

刺莊公也叔多才而好勇

好去聲

不義而

得衆也

曰鄭莊公詩平王時。蘇氏曰二詩皆曰叔于田故此加大以別之非謂段為大叔也然不知

者又加大于首章失之矣

兩叔于田其三章章五句短篇者止曰叔于田其三

章章十句長篇者加大以別之采詩之初未有序故

於首章加大後有序因存而不去猶書序作堯典之下復有堯典二字存其舊也公子呂云厚將得衆謂其所憑者厚則羣小將以利合也序祖其說以為得衆非謂其真能得人心也

大叔于田乘乘馬

曰上乘如字駕也下乘去聲四馬也

執轡如組

朱氏曰轡今之

韁也。錢氏曰組文五采相間手執六轡如組之文言其齊比。今曰疏謂織組者總純於此成文於彼御者執轡於手馬騁於道言如織組之為不若言如組之文為簡徑也純必二反兩驂如舞箋曰在旁
曰驂。傳曰驂之與服諧和中節。董氏曰五御之法有舞父衢者蓋詩所謂如舞也服制於衡不得如舞其

言舞者

叔在藪

傳曰藪澤禽之府也。疏曰澤水所鍾水希曰藪鄭有圃田此言藪圃田也

火烈具舉

今曰烈如載燔載烈之烈謂以火焚烈之也孟子益烈山澤而焚之大司馬注火熨火止

也春田用火因焚萊除陳草皆殺而火止。曹氏曰王制云昆蟲未蟄不以火田故爾雅謂火田為狩惟冬田

乃用火耳若夫刈草以為防驅禽而納諸防中然後焚而射焉則四時之田皆然也。傳曰具俱也。檀

虎

檀音但錫但上濁也。傳曰檀褐肉袒也。疏曰李巡云脫衣見體曰肉袒。獻于公所

將叔無狃

將音錡狃音紐。傳曰狃習也。朱氏曰國人謂之戒其傷女音

上篇叔于田段在京自出田也此大叔于田段在鄭

從莊公出田也叔之從公往田也駕一乘之馬矜其

多能代御人御自執馬轡如組文之齊比其兩驂之
馬如舞者之中於樂節皆見其善御也叔在林藪禽
獸所聚之地以火烈而焚之同時皆舉叔乃禮去裼
衣徒手搏虎以獻于莊公國君介弟之貴而氣習如
此見失教矣莊公不教誨禁止之其私昵之黨乃致
媚愛之辭曰請叔無狃習此事數數為之恐其或傷
汝也莊公為可刺矣○舊說執轡如組叔之御人下
文又良御忌乃言叔身善御自為支離也正以叔執

轡如組為善御耳

叔于田乘乘黃

傳曰四馬皆黃

兩服上襄

箋曰兩服中央夾轅者襄駕也上駕言為

衆馬之最良也。朱氏曰馬之上者為上

駕猶史所謂上駟也。今曰終日七襄

兩驂鴈行

音航

。疏曰兩驂與服其首差退如鴈行之有次序

叔在數火烈具揚

傳曰揚光也。疏曰言舉

火而揚其光也

叔善射忌

音記。傳曰忌辭也

又良御忌抑磬控忌

控空之去

。朱氏曰抑發語辭。傳曰驂馬曰磬止馬曰控。補

傳曰驂馬曰磬謂使之曲折如磬也止馬曰控謂有所

控制不逸也。今曰

抑縱送忌

朱氏曰舍拔曰縱拔音跋

兩服馬皆上駕其馬最良也兩驂馬如鴈行其首差

退也既言叔良御忌遂言其能磬以騁馬控以止馬
則馬之進退惟其意所以實其良御也既言叔善射
忌遂言其能後手勢而縱勢音薊子悅切前手擲而送則矢
去勁而有力所以實其善射也○縱放箭也送送箭
也今射者云前手擲後手勢擲即送也勢即縱也舊
說從禽曰送今不用

叔于田乘乘鵠

音保依字作鵠。釋獸曰驪白雜毛曰鵠。釋曰毛色黑白而復有雜毛相錯

者名鵠今所謂烏鵠

兩服齊首

傳曰馬首齊也

兩驂如手

箋曰如人左右手之相佐助也

叔在藪火烈具阜

傳曰阜盛也

叔馬慢忌

傳曰慢遲也

叔發罕忌

抑釋棚忌

棚音冰。傳曰棚所以覆矢。○疏曰昭二十五年左傳云公徒執冰而踞字異音義同箭

簫蓋也。簫音同箭室也。○今曰用矢則舉棚以開簫既用則納矢簫中釋下其棚以覆簫也

抑鬯弓

忌

鬯音暢。傳曰鬯弓弣弓弣音滔弓衣也。○疏曰鬯者盛弓之器。鬯弓謂弣弓而納之鬯中。鬯韻作韞注

云弓衣也

田事既畢則叔馬行遲矣叔發矢希罕矣釋棚以覆

矢矣以鬯鬯其弓矣言其從容得意如庖丁解牛提

刀而立為之四顧為之躊躇滿志善刀而藏之也亦

可想叔段洋洋之意矣。○段有不義之謀兄弟之間人所難言詩人優柔之意但言段矜能恃勇暴虎以獻氣陵其兄私黨諂事甘言媚說方且踴躍馳騁不能自己從容畢事意氣自得其氣習輕揚麤暴如此殆非令終之器所謂智伯射御足力則賢而以不仁行之者也公何為不早禁止之乎

大叔于田三章章十句

清人刺文公也

疏曰文公躋厲公突子躋音捷

高克好利而不顧其君

聲

好去

文公惡而欲遠之不能

惡鳥路反
遠去聲

使高克將兵而

禦狄于竟

將去聲
竟音境

陳其師旅翱翔河上久而不召衆散

而歸高克奔陳公子素惡高克進之不以禮

疏曰鄭之
公子名素

文公退之不以道危國亡師之本故作是詩也

曰鄭文
公詩平

王時。疏曰春秋閔公二年冬十二月狄入衛鄭棄其師衛在河北鄭在河南恐其渡河侵鄭故使高克將兵於河上禦之公子素作詩以刺之。胡氏曰人君擅一國之名寵殺生予奪惟我所制耳使高克不臣之罪已著按而誅之可也情狀未明默而退之可也愛惜其才以禮馭之亦可也烏有假之以兵權委諸境上坐視其卒伍離散而莫之卹乎然則棄師者鄭伯乃以國稱何也二三執政股肱心膂休戚之所同也不能進諫于君

協志同力黜逐小人而國事至此是謂危而不持顛而不扶則將焉用彼相矣春秋書曰鄭棄其師君臣同責矣

春秋經書鄭棄其師罪文公也與首序合

清人在彭

傳曰清邑也彭衛之河上鄭之郊也

駟介旁

旁

音耕○箋曰駟四馬也○傳曰介甲也○疏曰旁音然不息○今曰北山王事傍傍字異音義同

二

矛重英

重平聲○箋曰二矛酋矛夷矛也○疏曰考工記云酋矛常有四尺夷矛三尋注云八尺曰尋

倍尋曰常魯頌以矛與重弓共文弓無二等直是一弓而重之則知二矛亦一矛而有二故彼箋云二矛重弓備折壞直是酋矛有二無夷矛也○英傳曰矛各有英飾也○疏曰經言重英然一矛有重飾故云各有英飾

言其各自有飾竝建而重累魯頌說河上乎翱翔載驅

翔翔猶彷彿也彷彿音旁羊
○錢氏曰如鳥之翱翔也

高克所率清邑之人在於河上之彭地狄去無事乃

使四馬被甲驅馳旁旁然不息其車之上建酋矛夷

矛長短不同其英飾相重累翱翔於河上之地何為

者耶詩意謂彼既無事不召之使還將潰散矣永嘉鄭氏

曰夫擁大衆於外而無所事不為亂則潰散爾

清人在消傳曰消河上地也駟介麇麇音標。傳曰麇麇武貌二矛重喬

毛音橋鄭音驕。傳曰重喬累荷也。釋文曰荷舊音何。謂刻矛頭為荷葉相重累也。沈胡可反。謂兩矛之釋相負荷也。疏釋毛曰喬高也。以矛建於車上五兵之最。高者也。而二矛同高復有等級。故謂之重喬。謂此二矛。刀有高下重累而相負揭。箋曰喬矛矜近上及室。題所以縣毛羽。縣音玄。疏釋鄭曰矜謂矛柄也。室謂矛之矜孔裏。十年左傳曰舞師題以旌夏杜預云題也。題者表識之言。箋曰喬者矛之柄近於上頭及矛之

室之下當有物以題之。蓋音如芎識音志。

河上乎逍遙

錢氏曰逍遙行樂也。

清人在軸

音逐。傳曰軸河上也。疏曰彭消軸皆河上之地。久不得歸師有遷移三地亦應不

甚相駟介陶陶。音道。傳曰陶陶驅馳之貌。

左旋右抽中軍作好

去聲

○箋曰左人謂御者右車右也。中軍將也。疏曰左傳成二年說晉之伐齊云郤克將中軍解張御鄭丘緩為

右卻克傷於矢流血及屨未絕鼓音曰余病矣張侯曰
自始合而矢貫余手及肘余折以御左輪朱殷敢言
病張侯即解張也卻克傷矢言未絕鼓音是卻為將在
鼓下也張侯傷手而血染左輪是御者在左也此謂將
之所乘車耳兵車之法左人持弓右人持
矛中人御御不在左也解音蟹殷於閑反

師久不歸厭其處則復遷故自彭而消自消而軸
翔徧於河上之地既閒暇無所作為乃使在左之御
者習旋其車車右勇力之士抽兵刃以習擊刺將居
中央為容好而已遊戲以自樂也○一說好如字左
軍旋而歸右軍抽而退皆已逃散唯中軍高克所自

將雖作好而彊留亦不能久也亦通

清人三章章四句

羔裘刺朝也

潮朝音

言古之君子以風其朝焉

風音諷。曰鄭莊公

詩在平桓之間。箋曰朝無忠正之臣故刺之

或謂檜羔裘專刺其君唐羔裘專刺其臣鄭羔裘兼刺君臣按此詩言豹飾止是臣下之服舍命不渝及邦之司直邦之彥兮皆臣事也止當為刺在朝之臣

羔裘如濡

疏曰緇衣羔裘諸侯與其臣服之以日視詢朝也。傳曰如濡潤澤也。今曰濡濡也。

直且侯

歐陽氏曰洵信也。韓詩曰侯美也。

彼其之子

其音記。朱氏曰其語助辭。

舍

命不渝

舍音赦。傳曰渝變也。

言古之君子服羔裘之衣其色潤澤如濡濕之信其直而且美謂德稱其服也美其有德故謂其裘若有潤澤喜慕之辭也直者大公至正之謂也充實之謂美直而且美則養其剛大而至於充實矣命者天之所以賦予於我者舍則居之而安也人惟不安於命所守不固故不能剛大充實彼古之君子能安於命

臨利害而不變所以直而美也稱彼所以譏此也

羔裘豹飾

傳曰豹飾緣以豹皮也緣去聲○疏曰君用純物臣下之故袖飾異皮

孔武有

力

傳曰孔甚也

彼其之子邦之司直

傳曰司主也○今曰猶屠蒯言女為君耳將司

聰也之司

言古之君子服其羔裘而豹皮為袖之緣其人甚武而有力然非賁育之謂也繼言彼其之子可以司國之直謂敢行禮義不畏彊禦斯以為孔武有力也司直謂直道之宗主官名多稱司言主掌之也

羔裘晏兮

錢氏曰晏安也

三英粲兮

傳曰三英三德也。箋曰剛克柔克正直也。朱氏

曰粲鮮貌

彼其之子邦之彥兮

傳曰彥士之美稱

羔裘晏兮言德稱其服故服之而安猶云緇衣之宜

兮三英粲兮言三俊為國光華也。○三英或以為裘

之英飾前後有三如五紵五緇五總之類只是臆度

無文可據毛氏以為三德或疑牽合於三之數今考

立政三俊注以為剛柔正直英即俊也毛氏之說有

源流矣此詩每章第二句皆言德美知三英非言英

飾也

羔裘三章章四句

遵大路思君子也莊公失道君子去之國人思望焉

鄭曰

莊公詩在平桓之間。詩記曰武公之朝蓋多君子矣。至於莊公尚權謀專武力氣象一變左右前後無非祭仲高渠彌祝聃之徒也。君子安得不去之乎。曹氏曰莊公殺弟幽母加兵於天子其失道多矣。失道之君胡可與久處。宜君子之去之也。不有君子其能國乎。是以身死而國亂。至於公子五爭兵甲不息。有由然也。

鄭莊克段誓母交質之事在平王時

鄭莊前二十四年

交惡

歸祊繻葛之事在桓王時

鄭莊後十九年

入春秋首惡也羔

襄遵大路女曰雞鳴三詩之時無以明之疑而繫之

平桓之間毋質也

舊圖列之莊王誤矣鄭莊卒於桓之十九年不及莊王之世

遵大路兮

傳曰遵循也

摻執子之祛兮

摻音慘祛音驅。傳曰摻擊也。今曰擘

韻亦作攬釋云撮持也祛袖口也祛袂之祛從衣祛去之祛從示祛解見唐羔裘

無我惡兮

惡鳥

反路

不寔故也

寔子感反從韻。傳曰寔速也。今曰速猶言倉卒也

莊公失道君子惡之遵循大路而去其國人欲攬持

其裾袖以留之曰子無惡我而不留不可倉卒於故

舊也謂棄去之速也不言其惡莊公而以為惡我婉

辭也言故舊以先君之義諷之庶其或留也此詩止

惜賢者之去而莊公身不行道為君子所棄可見矣

大路非隱僻之所而君子遵此以去觀瞻所繫衆所

共惜莊公不留之乃使國人欲留之是可刺也

曹氏曰申

公白生彊起穆生曰獨不念先王之德歟即此詩欲留君子之意

遵大路兮摯執子之手兮無我勠兮

勠毛音讎鄭音醜○傳曰勠棄

也○箋曰亦惡也

不寔好也

好去聲○蘇氏曰好舊好也

遵大路二章章四句

女曰雞鳴刺不說德也

說音悅

陳古義以刺今不說德而

好色也

好去聲。曰鄭莊公詩在平桓之間

古者夫婦相警以勤生又能同心以親賢是好德而

不淫於色也

女曰雞鳴士曰昧旦

詩記曰昧晦也旦明也昧旦天欲旦晦明未辨之時也列子曰將旦

昧爽之交日夕昏明之際子興視夜明星有爛

傳曰言小星已不見也

將翱將

翔今曰翱翔雍容和緩之意

弋鳬與鴈

弋音翼鳬音符。箋曰弋繳射也繳音灼疏曰謂以繩繫

矢而射也繳謂生絲為繩也。曹氏曰鳬鷺解曰鳬野鷺。解見鳬鷺

此詩述夫婦相警之辭始婦警其夫曰雞鳴可興矣夫曰姑俟昧旦也婦又警其夫曰子宜興而視夜之如何蓋小星已不見唯明大之星爛然天將曉矣方將雍容翱翔而往弋取鳬鴈而歸早則從容晏則忽遽起不可以不早也○蘇氏以明星為啓明蓋今俗所謂曉星也毛氏謂天將曉則小星不見惟明大之星爛然雖不指為啓明然將曉而明大者惟啓明耳至陳東門之楊明星煌煌但言夜深則星明又不必

專為曉星矣

弋言加之

蘇氏曰加中也史記云以弱弓微繳加諸鳧鴈之上

與子宜之

朱氏曰和其所

宜也內則云牛宜稌羊宜黍豕宜稷犬宜粱鴈宜麥魚宜苽

宜言飲酒與子偕老琴

瑟在御莫不靜好

婦人謂其夫曰子弋射鳧鴈加而中之我當與子和

其滋味之所宜既和其所宜以之飲酒相樂期于子

以偕老飲酒之時琴瑟在於侍御莫不安靜而和好

言夫婦相愛之意也

朱氏曰射者男子之事而中饋者婦人之職也

知子之來之雜佩以贈之

傳曰雜佩者珩璜琚瑀衝牙之類音行黃居禹○朱氏曰

珩佩之上橫者也下垂三道貫以蠙珠璜如半璧繫於兩旁之下端琚如圭而兩端正方在珩璜之中瑀如大

珠在中央之中別以珠貫下繫於璜而交貫於瑀復上繫於珩之兩端衝牙如牙兩端皆銳橫繫於瑀下與璜

齊行則衝橫出聲也○箋曰贈送也知子之順之雜佩以問之

傳曰問遺也遺音位

○疏曰曲禮云凡以苞苴簞筍問人者左傳

知子之好

之聲好去雜佩以報之

婦語其夫謂知汝所招來而新相知者吾將解雜佩

以贈送之知汝所和順而莫逆於心者吾將解雜佩

以遺問之知汝所好慕而尊敬之者吾將解雜佩以
報答之雜佩難得之物未必常有特言苟有賢者之
至當有以結其歡心而無所愛於服玩之物此由其
夫好德故其妻能奉承其意也

女曰雞鳴三章章六句

有女同車

尺奢反

刺忽也

疏曰昭公忽莊公寤生世子祭仲逐之而立突

鄭人刺

忽之不昏于齊太子忽常有功于齊齊侯請妻之

妻音砌

齊女賢而不取

娶音

卒以無大國之助至於見逐故國人

刺之曰鄭昭公初立詩桓王時。疏曰桓六年傳曰北
戎侵齊齊侯乞師于鄭鄭大子忽帥師救齊六月
大敗戎師獲其二帥大良少良甲首三百以獻于齊是
大子忽嘗有功於齊也傳又云公之未昏于齊也齊侯
欲以文姜妻鄭大子忽大子忽辭人問其故大子曰人
各有耦齊大非吾耦也詩云自求多福在我而已大國
何為君子曰善自為謀及其敗戎師也齊侯又請妻之
固辭人問其故大子曰無事於齊吾猶不敢今以君命
奔齊之急而受室以歸是以師昏也人其謂我何遂辭
諸鄭伯如左傳文齊侯前欲以文姜妻忽後復欲以他
女妻忽再請之此言齊女賢而忽不取謂復請妻者非
文姜也妻音砌。廣漢張氏曰忽之不昏于齊未為失
也而詩人追恨其失大國之助者蓋見忽之弱為甚追
念其資於大國或有以自立此國人之情也蓋忽者先
君之世子其立也正故其始也
國人見其逐而憐其無助耳

突挾宋之援以逐忽故國人惜忽之無援而作此詩也春秋桓五年經書鄭忽出奔衛以其失國故不稱子十五年經書鄭世子忽復歸于鄭以其歸國故稱世子以其終失國出入皆不稱鄭伯此首序稱忽擊鼓稱州吁墓門稱陳佗皆用春秋書法知經聖人之手矣

有女同車

傳曰親迎同車也。疏曰士昏禮云女始乘車壻御輪三周是同車也。

顏如舜

華

如字。傳曰舜木槿也。釋草曰槿木槿。槿木槿。音假。樊光曰別二名也。其樹如李。其華朝生暮落。

○陸璣曰五月始華故仲夏月令云木槿榮○山陰陸氏曰取瞬之義○曹氏曰舜華易落而無實以況有色

而德不將翺將翺今曰翺翺雍容和緩之意佩玉瓊琚解見衛木瓜彼美

孟姜

傳曰孟姜齊之長女也疏曰他女必幼於文姜未必實長假言其長而美之洵美且都

洵音荀○箋曰洵信也傳曰都閑也○疏曰都者美好閑習之言司馬相如上林賦云妖冶閑都

忽以弱見逐國人追恨其不取齊女言忽所取他國之女行親迎之禮而與之同車者特取其色爾此女色如木槿之華朝生暮落不足恃也而今也且翺且翔於此佩其瓊琚之玉徒有威儀服飾之可觀而無

益於事也曷若彼美好齊國之長女信美而且閒雅
向來忽若取之則有大國以為援而不至於見逐矣
○舊說以有女即孟姜其文重複彼乃別指之辭有
女同車指忽所取者彼美孟姜指忽所不取者忽之
辭齊昏也祭仲曰君多內寵子無大援將不立正此
詩之意也

有女同行

錢氏曰同以車行也

顏如舜英

傳曰英英華也

將翱將翔佩玉

將將

音將將音將

釋文曰將將玉佩聲

彼美孟姜德音不忘

德音解見假樂

言齊女有賢譽至今使人不能忘恨不取之也車牽

德音來括言其有賢譽此言德音不忘即所謂齊女

賢而不取也

詩記曰不借助於大國而自求多福忽非奮然誠有是志也蓋其為人淺狹而

多所拘攣暗滯而動皆疑畏浮易而不知審量子牙然以文義自喜而國勢人情與其身之安危皆懵然莫之察也適足以取亡而已矣使忽誠有是志而深求其實則質之弱固可彊而所以持國者固無待於外助也惟其為善有名而無情所以卒見嗤於祭仲而為詩人所閔此功利之說所以多勝而信道者所以益寡也

有女同車二章章六句

山有扶蘇刺忽也所美非美然

今曰鄭昭公詩桓莊之間疏以山有扶蘇擇兮

狡童三詩為忽後立時事則為莊王時然未有以明之

為君在辨君子小人而已忽闇於知人所美之人非

真美也

山有扶蘇

傳曰扶蘇扶胥小木也。疏曰釋木無文毛當有以知之未詳其所出也隰有荷

華

如字。傳曰荷華扶藁也。釋文曰未開曰菡萏已發曰芙蓉菡萏之上濁頷撼同音菖談之上濁禪髮

同音不見子都

釋文曰都美也。傳曰子都世之美好者也

乃見狂且

沮之平傳曰

且狂人也
且辭也

興也山有扶蘇之小木樸櫟不足道喻么麼之小人此非美也隰有扶蕖之名華自拔於污泥之中喻修絜之君子此美也美惡本不難見忽乃所美非美用捨倒置君子去之在其朝者皆小人耳故不見都美之賢人惟見狂人也○世稱美好之人為子都孟子所稱子都以貌之美此詩所稱子都以德之美猶美人之名或稱美貌或稱美德詩彼姝者子兩出一為賢者一為女子也若以此子都為美貌則與狂且意

義不貫鄭氏以狂為醜其說牽彊此詩子都子充皆指賢人耳都美好也充充實也非有人名子都子充也○或謂山隰有草木喻國之有人材耳不必彊為分別此說非也凡詩言山隰有草木其草木皆相類故不必分別此詩以扶蘇對荷華以喬松對游龍皆不相類荷名華也扶蘇小木不知其為何木其名不顯其木可知是荷華與扶蘇非類也松名木也其材可為棟梁以喬言之則又高竦而挺持龍凡草也又

以游言之則枝葉放縱與喬木亦非類也周子以蓮
有君子之德夫子稱松有後凋之操晉人稱和嶠為
千尺松皆以荷松喻賢豈扶蘇游龍輩所可同日語
哉時人比竝言之蓋美惡相形矣

山有喬松

王氏曰
喬高也

隰有游龍

箋曰游放縱也。傳曰龍
紅草也。釋草曰紅龍古

其大者歸龍音龍。舍人曰紅名龍古。陸璣
曰一名馬蓼葉大而赤白色生水澤中高丈餘

不見子

充

疏曰充實
忠良者

乃見狡童

今曰狡獪也
徙牙非徙个

山有喬高之松木挺特而秀拔喻特立之君子此美

也隰有放縱之龍草縱橫而亂生喻縱恣之小人此
非美也今忽所美非美故不見充實之賢人乃見狡
獪之小子也李德裕言正人如松柏特立不倚邪人
如藤蘿非附他物不能自起游龍正堪與藤蘿為伍
耳

山有扶蘇二章章四句

蘄兮

蘄音託

刺忽也君弱臣彊不倡而和也

倡音唱和去聲。曰鄭昭

公詩桓莊之間。補傳曰後篇權臣擅命指祭仲此篇亦指祭仲也

此詩小臣願忠於國而力不能自為也後序之言非
詩意也

穽兮穽兮

疏曰七月傳云穽落也落葉謂之穽。今曰
槁葉未辭柯以風所吹而必落故呼槁葉為

穽也

風其吹女

音汝

叔兮伯兮

錢氏曰叔伯
謂諸大夫也

倡予和女

興也此小臣有憂國之心呼諸大夫而告之言此槁
葉在柯風將吹女不能久矣天大風則槁葉無不落
喻國有難則大夫皆不安禍將及矣豈可坐視以為
無與於己而不相與扶持之乎叔伯諸大夫其亟圖

之汝倡我則我和汝矣謂患無其倡不患無和之者
也當時卒無倡之者由忽無忠臣良士也二女字皆
呼諸大夫

擇兮擇兮風其漂女

漂音飄。傳曰漂猶吹也。

叔兮伯兮倡予要女

要音腰。傳曰要成也。

成女謂相與成其事也

擇兮二章章四句

狡童刺忽也不能與賢人圖事權臣擅命也

擅音繕。箋曰祭仲。

專也。○今曰鄭昭
公詩桓莊之間

狡童或以為指忽或以為指祭仲春秋書忽乃聖人
筆削以示褒貶首序稱忽亦國史所題經聖人之手
忽以世子為鄭君其當時國人作詩義不得目為狡
童也若指祭仲則祭仲自莊公時已為卿且為莊公
取鄧曼而生昭公當昭公即位仲已老矣不應目為
童也今考山有扶蘇之詩刺忽所美非美乃見狂且
狡童是所用之人非狂即狡此詩正指忽所用之人

耳聖人刪詩以垂世教安取目君為狡童乎

彼狡童兮不與我言兮維予之故使我不能餐兮

餐聚之平

忽所美非美以狡童為賢而信用之不與賢人圖事
賢者憂之不欲斥忽而斥其所用之人也為告忽言
之故指狡童為彼而稱忽為子曰彼狡獪之童少不
更事恃權寵而侮老成故不與我言也彼狡童不足
恤吾惟憂君之故恐為所誤至於不能餐也○舊說
既以狡童指忽又以子為指忽非也彼以指忽之所

用子以稱忽則語意抑揚分明矣彼者薄之之辭子者親之之辭也權臣擅命將有他志惡察察言故但言憂之而不能餐微辭也

彼狡童兮不與我食兮維子之故使我不能息兮

朱氏曰
息安也

共食則可以從容謀事耳不能息謂不安息也食息俱廢憂之深也○舊說謂不與食天祿今不從此詩蓋忽之朝猶有賢人在焉而忽不與之謀耳非謂在

野之賢也

詩記曰賢者於忽懇懇如此而忽不之察馬上下可謂不交矣疎其可親親其可疎

斯其所
以亡也

狡童二章章四句

褰裳

褰音愁

思見正也狂童恣行

去聲。疏曰忽是莊公世子於禮宜立非詩人

所當疾故知狂童恣行謂突也正謂正爭者之是非去突而定忽

國人思大國之正已

也

曰鄭昭公初立詩桓王時

鄭人始作擇兮望大夫相與扶持之既無其人則又作褰裳望大國之見正蓋惓惓於忽也說者多以狂童指忽非也忽以世子嗣位其立也正國人憂之至

於不能餐其情可見此詩及有女同車皆欲求援大國以扶植之也王道既微小國無所控懇往往思方伯之拯己霸圖能無興乎是可以觀世變矣

子惠思我

今日惠言思惠我也

褰裳涉溱

釋文曰褰掘也掘挈也掘恪侯反。釋文曰溱

水名出鄭字作溱。補傳曰洧溱未必褰裳可涉詩人此言欲其急於拯亂耳

子不我思豈無

他人狂童之狂也且

沮之平。朱氏曰且語助辭也

突以庶奪嫡忽位已定而篡之國人無如之何故思大國正其孰為當立孰為不當立子斥大國之人也

大國有以恩惠而念我鄭國之亂欲來為我討正之者非道遠而難至但褰揭其裳涉溱水則至矣子不我思則豈無他國思我者乎何為皆不來也望大國之正已其情甚切不主一國也所以告急者突乃狂童以庶奪嫡其狂已甚也○舊說謂爾不我思則當有他國思我者如此則自為悠緩之辭非告急之意子惠思我褰裳涉洧

音委。傳曰洧水名。李氏曰說文云洧出潁川陽城山東南入潁

箋曰他士猶他人也

狂童之狂也且

褰裳二章章五句

丰

音峰

刺亂也昏姻之道缺

箋曰謂嫁娶之禮

嫁

陽倡而陰不和

音倡

唱

和聲

男行而女不隨

曰昭公詩桓莊之間

。疏曰丰東門之墀風雨子衿直云刺亂世耳

或當突筭之時或當忽入之後其時難知要之是忽為主亦宜繫忽皆昭公詩

忽初立在桓王時復立在莊王時扶蘇擗兮狡童丰

東門之墀風雨子衿揚之水詩不明何時作則疑而

附之桓莊之間疏指山有扶蘇至狡童為忽後立時

事唯丰以下其時難知要之八詩一體皆難定其時

也

子之丰兮

傳曰丰豐滿也

俟我乎巷兮

傳曰巷門外也。疏曰門外之道也。

悔予

不送兮

此詩述婦人之辭也。男子親迎，女有他志而不從其後，復思親迎之人，謂子之面貌丰丰然豐滿出門而待我於門外之巷，悔我當時不送是子而去也。

子之昌兮

傳曰昌盛壯貌

俟我乎堂兮

疏曰士昏禮主人揖賓入于廟，主人升堂，西面

賓升堂北面，奠鴈再拜稽首，降出婦從，降自西階。是則士禮受于廟堂，庶人雖無廟堂亦受女于寢堂。

悔

予不將兮

箋曰將送也

衣錦褰衣

上衣服如字褰傾之上字亦作綯。解見衛碩人

裳錦褰裳

箋曰庶人之妻

也嫁服

叔兮伯兮駕予與行

今曰行出適也解見鄘蝥螭

女失其配耦悔前不行自說衣服之備望夫更來迎

已言已衣用錦為之其上加褰衣裳用錦為之其上

加褰衣裳備足可以行嫁乃呼迎者之字云叔兮

伯兮若復駕車而來我則與之行矣

裳錦褰裳衣錦褰衣叔兮伯兮駕予與歸

葛覃傳曰婦人謂嫁曰歸

丰東門二章章三句二章章四句

東門之墠

音善禪之上濁

刺亂也男女有不待禮而相奔者也

曰昭公詩桓莊之間

丰東門之墠溱洧三詩皆以鄭亂之故而男女不正

故皆曰刺亂也出其東門言閔亂亦此意

東門之墠

傳曰城東門也。今曰東門鄭要會之地隱公四年左傳宋公陳侯蔡人衛人伐鄭圍其

東門。疏曰墠除地。去草也。封土為壇。除地為壇。

茹蘆在阪

茹蘆音如閭阪音反。曰茹蘆者菑

草也。菑韻亦作菑。釋草曰茹蘆茅蒐。李巡曰一名菑可以染絳。疏曰陂陀不平而可種者名阪。其

室則邇其人甚遠

東門有墦其墦之外有阪茹蘆之草生焉此男子所
居之處也女欲奔之而未遂故言其室則近不難至
也其人甚遠未得就之也

東門之栗

疏曰栗樹
生於路上

有踐家室

伐柯傳曰
踐行列貌

豈不爾思子

不我即

女欲奔而未得望男之就已也

東門之墦二章章四句

風雨思君子也亂世則思君子不改其度焉

曰昭公詩桓莊之間

鄭公子之亂時事反覆士之怵於利害隨勢變遷失

其常度者多矣故詩人思見君子焉

風雨淒淒

音妻。曰淒淒寒涼之意。考見邶綠衣。

雞鳴喈喈

音皆。葛覃傳曰喈喈和

聲之既見君子云胡不夷

今曰傳以夷為悅心悅則夷平憂則鬱結也

興也風雨淒淒然寒涼雞猶守時而鳴喈喈然其聲

之和興君子雖居亂世不變改其節度我得見此人

則我心豈不坦然而平夷哉感當時無此人思而不

得見之辭也

風雨瀟瀟

傳曰瀟瀟暴疾也。朱氏曰風雨聲。

雞鳴膠膠

錢氏曰膠膠聲也。今曰膠膠。

擾擾是雜之意。謂羣雞之聲也。

既見君子云胡不瘳

音抽。傳曰瘳愈也。李氏曰言如

愈也。病之瘳。

風雨如晦

傳曰晦昏也。

雞鳴不已既見君子云胡不喜

晝而如晦風雨之甚而雞晝鳴不已也

風雨三章章四句

子衿

音今

刺學校廢也亂世則學校不修焉

曰昭公詩桓莊之間

學校興者治之象也學校廢者亂之證也

青青子衿

傳曰衿領也。疏曰襟交領也衿與襟音義同

悠悠我心

程子曰悠悠我心賢

者悲傷當時如此

縱我不往子寧不嗣音

鄭以國亂學校不修生徒解散賢者憂之言汝學子服青青之衿願宜會聚於學校以講習今散而何所之乎使我心悠悠然深長思之縱我不往見汝汝寧不繼聲以問我乎言此者以學校廢而朋徒解散不相聞知見時之亂也非要其來見而責望之也

青青子佩

傳曰佩玉也士佩瑀珉而青組綬瑀音軟。疏曰玉藻士佩瑀玼而緼組綬此云青組綬

者蓋毛讀禮記作青字緼音溫。今曰玉藻一命緼韍幽衡注云緼赤黃之間色幽音酉悠悠我思

縱我不往子寧不來

既不繼聲問亦不來訪

挑兮達兮

挑音叨又音忼達音撻。朱氏曰挑輕儇跳躍之貌達放恣也

在城闕兮一

日不見如三月兮

人既廢學乃挑然輕躍達然放恣但好登城上之高

闕以候望為樂賢者念之一日不見已如三月之久

況非止一日乎傷時事之至此念朋會之無從也

子衿三章章四句

揚之水閔無臣也君子閔忽之無忠臣良士終以死亡

而作是詩也

曰昭公詩桓莊之間。今白忽時未死亡終必死亡耳

忽非無臣也臣非忠良雖有之如無之揚之水三篇
王風言平王不能令諸侯唐風言晉昭不能制沃此
詩言忽不能制權臣皆興微弱也忽能用忠臣良士
則轉弱為彊矣

揚之水不流束楚

解見王風。曹氏曰此先楚後薪以見臣之愈彊耳

終鮮兄弟

鮮

上

維予與女

音汝

無信人之言人實廷女

廷徐音姜之去本音狂之

上濁。傳曰廷誑也

興也楚本浮物一束之楚本非不可流轉而悠揚之水不能流轉之猶忽之微弱不能號令其臣也昭公兄弟甚衆無與忽同心者故言今兄弟雖多終竟是少謂要其終必不相助雖多猶少也此詩忽兄弟所作故曰維予二人外此無與同心者也兄弟且如此

況他人乎故言無信他人之言他人實欺廷汝耳見

無忠臣也

曹氏曰按左傳忽突爭國而子儀子亶更立及至莊十四年忽與子儀子亶皆已死

而原繁謂厲公曰莊公之子猶有八人不得為鮮○詩記曰無信人之言非教之以不信人言也忽既微弱彊公子復多其臣大抵懷二心而外市僅有一二人實心向之者乃暗於情偽不知所倚故提耳而告之也

揚之水不流束薪終鮮兄弟維予二人無信人之言人

實不信

揚之水二章章六句

出其東門閔亂也公子五爭兵革不息男女相棄民人

思保其室家也

曰厲公詩僖王時。疏曰桓十一年左傳云祭仲為公取鄧曼生昭公故祭仲

立之宋雍氏女於鄭莊公生厲公故宋人誘祭仲而執之曰不立突將死祭仲與宋人盟以厲公歸而立之秋九月昭公奔衛己亥厲公立是一爭也十五年傳云祭仲專鄭伯患之使其壻雍糾殺之雍姬知之以告祭仲祭仲殺雍糾厲公出奔蔡六月乙亥鄭世子忽復歸于鄭是二爭也十七年傳云初鄭伯將以高渠彌為卿昭公惡之固諫不聽昭公立懼其殺己也弑昭公而立公子亶是三爭也十八年傳云齊侯師于首止子亶會之高渠彌相七月齊人殺子亶而轅高渠彌祭仲逆鄭子于陳而立之服虔云鄭子昭公弟子儀也是四爭也莊十四年傳云鄭厲公自櫟侵鄭及大陵獲傳瑕曰苟舍我吾請納君與之盟而舍之六月傳瑕殺鄭子而納厲

公是五爭也忽亦再為鄭君前以太子嗣立不為爭篡故唯數後為五爭也雍平聲女尼據反疊音尾轆音患

此詩與中谷有推皆以世亂之故而男女不相保故

序皆以閔傷言之

出其東門

東門解見東門之墀

有女如雲

傳曰如雲衆多也

雖則如雲匪

我思存縞衣綦巾

縞音杲綦音其。傳曰縞衣白色綦巾蒼艾色。疏曰縞細縵也戰國策

云彊弩之末不能穿魯縞然則縞是薄縵不染故色白也綦者青色之小別艾謂青而微白為艾草之色箋云

綦文亦以為青色但巾上為此蒼文非全用蒼色為巾也與毛異

聊樂我員

樂音洛員音云。園

有桃箋曰聊且略之辭。疏曰云員古今字助語辭也

鄭國之亂男女相棄有出其東門見婦人之見棄者
其多如雲雖如雲之多皆非我思慮所存也我心所
存在於服白繒之衣綦文之巾者是我之室且得相
樂幸不相棄足矣何暇閔憐他人之室家乎此感時
之亂自顧其室家亦恐不能相保也縞衣綦巾稱其
妻猶云荆釵布裙也

出其閨闥

二字音因都。傳曰閨曲城也。闥城臺也。疏曰閨是門外之城即今之門外曲城是也。

闥是城上之臺謂當門臺也。

有女如荼

音徒。曰此茶茅草秀出之穗也。疏曰鄭於地官掌茶

注及既夕注與此箋皆云茶茅秀然則此言如茶乃是
茅草秀出之穗非苦菜及委葉二種茶草也茅之秀者
其穗色白言女皆喪服色如茶然吳語說吳王夫差於
黃池之會陳兵以脅晉萬人為方陳皆白常白旗素甲
白羽之矰望之如茶韋昭云茶茅秀亦以白色為如茶
與此傳意同女見棄所以喪服者王肅云見棄又遭兵
革之禍故皆喪服也矰音曾雖則如茶匪我思且○音徂
短矢也○三茶考見邳谷風雖則如茶匪我思且○音徂
文曰爾雅云存縞衣茹蘆○音如閭○傳曰茹蘆茅蒐之
也舊子徐反縞衣茹蘆○音如閭○傳曰茹蘆茅蒐之
聊可與娛○傳曰娛樂也

出其東門二章章六句

野有蔓草

蔓音萬

思遇時也君之澤不下流民窮於兵革

男女失時思不期而會焉

曰厲公詩
僖王時

思遇時者厭亂而思治也不期而會非詩意

野有蔓草

傳曰蔓
延也

零露漙漙

漙音團。傳曰
漙漙然盛多也

有美一人

清揚婉兮

清揚考見廊
君子偕老

邂逅相遇

邂逅音械候。陳氏
曰網繆詩言昏姻云

見此邂逅邂逅正謂昏姻非淫奔也。今曰邂逅謂其
議速成猶迨迨其今今之意今人言事之速者云邂逅而

成

適我願兮

今曰適意適興
皆快適之意

興也野有蔓延之草者由天零落其露漙漙然盛多

以潤澤之興國有蕃庶之民者由君下恩澤以養育

之謂民免兵革之禍男女及時也有美好之女其目
清明其眉揚起婉然而美者使昏姻之議邂逅而成
則適我之願也遭時之亂昏姻之道若願之而不可
得之辭也

野有蔓草零露瀼瀼

音穰。朱氏曰
瀼瀼露多貌

有美一人婉如

清揚邂逅相遇與子偕臧

傳曰臧
善也

與子偕臧猶言各得其所欲也

野有蔓草二章章六句

溱洧

音臻委

刺亂也。兵革不息，男女相棄，淫風大行，莫之

能救焉。

曰：厲公詩僖王時。王氏曰：羞惡之心，莫不有之。而其為至於此者，豈其人性之固然哉？兵革

不息，男女相棄而無所從歸也。是以至於如此。然則民之失性也為可哀，君之失道也為可刺。

鄭衛多淫，詩衛由上之化，鄭由時之亂也。漢地理志皆以為風土之習固然，若是則教化為虛言，而二南之義誣矣。

溱與洧

傳曰：鄭兩水名。解見褰裳。前漢地理志：鄭地右雒，左沛，食溱洧焉。土陋而險，山居谷汲，男

女亟聚會，故其俗淫亟音罷。

方渙渙兮

渙音喚。傳曰：渙渙，春水盛也。箋曰：冰已釋，水則渙渙。

然。李氏曰說文云渙流散也。蓋春冰解釋而流散也。韓詩注云鄭國之俗三月上巳之辰往溱洧兩水之上。

招魂續魄秉蘭。士與女方秉蘭兮。蘭音艱。傳曰蘭蘭草以祓除不祥也。陸璣曰香草也。

楚辭紉秋蘭以為佩。女曰觀乎士曰既且。音徂徐音沮之平。且往。

觀乎洧之外。且如字。洵訐且樂。洵音荀訐音吁樂音洛。箋曰洵信也。傳曰訐大。

也。維士與女伊其相謔贈之以芍藥。芍音杓。傳曰芍藥香草。陸璣曰

今藥草芍藥無香氣未審今何草。詩記曰即今之芍藥。陸璣必指以他物蓋泥毛公香草之言欲求香於柯

葉置其花而不論爾

鄭國之俗以上巳出游溱洧之上男女雜沓今以淫

風既行有因出游而相挑誘者言溱洧之間春冰既泮方渙渙然流散有士與女適野游行秉執蘭草女謂士曰盍往觀乎邀其偕行也士曰既以觀矣未從之也女又勸男云且復更往觀乎洧水之外聞其土信訐大而可樂士於是從之因相與戲謔又以芍藥香草為贈所以結恩情之厚也

溱與洧瀏其清矣

瀏音留。傳曰瀏深貌。說文曰流清也。

士與女殷其盈

矣

傳曰殷衆也。

女曰觀乎士曰既且且往觀乎洧之外洵訐且

樂維士與女伊其將謔

今曰將相將也方且猶將安將樂之將

贈之以芍

藥

鄭衛皆淫聲孔子獨先於鄭今鄭之淫詩顧少於衛何也詩之見在者孔子所存以為世戒也聖筆所刪多矣言鄭聲淫者舉其大體言之不繫今詩之多寡不必盡黜國史所題例目之為男女之詩以求合於鄭聲淫之說也

溱洧二章章十二句

詩緝卷八

欽定四庫全書

詩緝卷九

宋 嚴粲 撰

齊

國風

譜曰齊者古少皞之世爽鳩氏之墟周武王伐紂封太師呂望於齊是謂齊太公都營丘後五世哀公政衰荒淫怠慢紀侯譖之於周懿王使烹馮齊之變風始作○疏曰漢書地理志云齊郡臨淄縣師尚父所封也臣瓚按臨淄即營丘也今齊之城內有丘即營丘也淄水過其南及東以丘臨水謂之臨淄齊世家云太公卒子丁公伋立卒子乙公得立卒子癸公慈母立卒子哀公不辰立是為五世○程子曰君臣上下之分失則人倫亂

人倫廢則入於禽獸身為禽獸之行其風可知故次以齊

政令僅行於郊畿而畿內之鄭亦自為列國則王室之微甚矣於是乎齊始霸故王鄭之後次以齊也子

夏言鄭音好濫淫志衛音趨數煩志

趨數音促速

齊音敖

辟喬志

敖辟喬音傲僻驕

皆淫於色而害於德齊亦二南之

變也

雞鳴思賢妃也哀公荒淫怠慢

疏曰哀公不辰癸公慈母子

故陳賢

妃貞女夙夜警戒相成之道也

曰齊哀公詩懿王時

變風自懿王始幽前此矣其始懿何也君臣相疑則
幾於變矣成王悟而周公歸於是乎有雅頌制作之
盛而變風之跡泯矣由懿以降變而不復正也宣號
興復無能改於風之變也齊哀之荒淫罪也受譖而
烹之非政也上下交失變之始也此詩直刺荒淫序
言思賢妃者詩人言外之意也

雞既鳴矣朝既盈矣

潮朝音

匪雞則鳴蒼蠅之聲

曹氏曰
哀公以

雞鳴為蒼
蠅之聲

古者太師奏雞鳴則君當起今雞已鳴矣會集於朝
中者已盈滿矣哀公乃謂此非雞之鳴是蒼蠅之聲
耳雞鳴與蠅聲不相類見荒淫昏亂也哀公無夜氣
之存矣○舊說以為古之賢妃警其夫欲令早起誤
以蠅聲為雞聲蠅以天將明乃飛而有聲雞未明之
前無蠅聲也

東方明矣朝既昌矣

傳曰昌盛也

匪東方則明月出之光

曹氏

曰哀公以東方明為月出之光

蟲飛薨薨

音轟。朱氏曰薨薨羣飛聲。

甘與子同夢會且歸矣

傳曰會會

於朝也

無庶予子憎

今曰無庶猶庶無古人辭急倒用也。予子吾子也。稱其所昵也。愛而稱之。

之辭也。秦風婦愛其夫稱予美大雅商人愛武王稱子侯。

羽蟲羣飛之聲薨薨然天既曉而哀公起已晏矣猶

語其所昵曰吾方甘與子卧而同夢迫於視朝而起

吾會朝即歸庶無為吾子所憎也此兒女昵昵恩怨

爾汝之辭持被入直刺刺顧婢子語之情狀也

刺音辣語

聲也聖人刪詩著此以見閨門淫昵之私無隱不顯也

為戒深矣

雞鳴三章章四句

還音旋刺荒也

曹氏曰書云外作禽荒孟子云從獸無厭謂之荒則荒者謂以田獵而荒棄政事也

哀公好田獵

好去聲

從禽獸而無厭

去平二音

國人化之遂成

風俗習於田獵謂之賢閑於馳逐謂之好馬

好如字曰齊哀公詩

懿王時

齊雍容文雅之俗也一旦遷染愈下獵者旁午於道

畢事而歸猶意氣勃勃而不自知其非也習俗之陷

溺如此哉故曰上之所好惡不可不謹也

子之還兮

傳曰還便捷之貌○曹氏曰謂馳逐之便捷

遭我乎狁之間兮

音狁

狁乃刀切○

傳曰狁山名○曹氏曰在齊之郊

竝驅從兩肩兮

傳曰從逐也獸三歲曰肩肩亦

作駢○

疏曰大司馬云大獸公之七月云獻駢于公則肩是大獸故言三歲也

揖我謂我儼兮

儼音喧許全反○

傳曰儼利也○箋曰譽之者以報前言還也○疏曰言其便利馳逐○今曰荀子云鄉曲之

子儼

國人好田成俗俱出田獵而相從既歸而相謂曰以

子之便捷還然向來遭我於狁之間我與子竝行

驅馬從逐兩獸子乃揖我謂我甚僇利也以子之能

尚且見推此自矜於其黨以氣陵之之辭也

子之茂兮

傳曰茂美也○曹氏曰謂才藝之茂美也

遭我乎狃之道兮竝驅

從兩牡兮揖我謂我好兮

子之昌兮

錢氏曰昌盛壯也

遭我乎狃之陽兮

朱氏曰山南曰陽

竝驅

從兩狼兮

釋獸曰狼牡獫狁狼其子獫狁有力迅獫狁音歡獫狁音叫○舍人曰狼牡名獫狁北名狼其子

名獫狁絕有力者名迅○說文曰狼似犬銳頭白頰高前廣後○陸璣曰其鳴能小能大善為小兒啼聲以誘人

其猛健者去之數十步揖我謂我臧兮傳曰臧善也○詩記曰齊以游

雖善用兵者不能免也

畋成俗詩人載其馳驅而相遇也意氣飛動鬱鬱見於眉睫之間染其神者深矣夫豈一朝一夕所能反哉

還三章章四句

著

音除又音住

刺時也時不親迎也

迎去聲○曰齊哀公詩懿王時

禮唯天子不親迎使三公迎后魯哀公曰冕而親迎

不已重乎孔子曰合二姓之好以繼先聖之後以為

天地宗廟社稷之主君何謂已重乎是諸侯以下皆

當親迎也當時皆不親迎此詩言卿大夫士之事舉

其中以明上下也

俟我於著乎而

傳曰俟待也門屏之間謂之寧○疏曰孫炎云門內

屏外人君視朝所寧立處也著與寧音義同

充耳以素乎而

疏曰塞耳也即所謂瑱也懸當

耳故謂之塞耳以素絲為統也統懸瑱之繩也統用雜綵線織之天子諸侯五色臣三色素色分明目所先見故先言之瑱天尚之以瓊華乎而
朱氏曰尚加也○張子曰充耳非一物先去聲統音膽

以續塞後以瓊華加之○傳曰瓊華美石士之服也○箋曰瓊華石色似瓊也○瓊解見衛木瓜○疏曰瓊玉之美名華光華也君以玉為瑱臣則不可

設為嫁者之辭言其夫待我於夫家門屏之間見其充耳以素絲為統也其統之末加以美石如瓊之華

謂瑱也服此服飾而止俟我於其家門屏之間而壻
往婦家之禮不行矣是不親迎也○此詩總言卿大
夫士也於著於庭於堂止是待有先後耳毛以為一

章述士二章述卿大夫三章述人君今從鄭義

詩記
曰前

漢地理志載齊之風俗曰俟我於著乎而此亦其舒
緩之體也雖非此篇意之所主然廣谷大川異制民
生其間異俗剛柔輕重遲速異齊皆學者所當觀也
詩可以觀其此類歟○補傳曰齊人廢親迎之禮安
然舒緩俟我於
其家門屏之間

俟我於庭乎而充耳以青乎而

箋曰青
統之青

尚之以瓊瑩乎

欽定四庫全書

卷九

而瑩音榮。○今曰瓊瑩者美石如瓊之瑩也。瑩鮮潔也。鄭氏云玉色似瓊似瑩非也。○曹氏曰英華瑩皆光

也。

俟我於堂乎而充耳以黃乎而

箋曰黃尚之以瓊英乎

而箋曰瓊英猶瓊華也。○詩記曰昏禮壻往婦家親迎既奠鴈御輪壻乃先歸俟于門外婦至壻揖婦以入

及寢門揖入升自西階齊人既不親迎故但行婦至壻家之禮俟我於著乎而此昏禮所謂壻俟于門外婦至壻揖婦以入之時也俟我于庭乎而庭在大門之內寢門之外此昏禮所謂及寢門揖入之時也俟我於堂乎而升階而後至堂此昏禮所謂升自西階之時也壻道婦入故於著於庭於堂每節皆俟之也

著三章章三句

東方之日刺衰也君臣失道男女淫奔不能以禮化也

曰齊哀公

詩懿王時

衰謂政衰民散淫風肆行而無忌也

東方之日兮

傳曰日出東方人君明盛無不照察也

彼姝者子

姝音樞○箋曰姝美

也在我室兮在我室兮履我即兮

朱氏曰履隨也○今曰履訓踐踐其跡而

從之故為隨也○箋曰即就也

興也君猶日也君道明盛則如日出東方無不照察

今有姝美之女子來在我之室既在我之室隨我而

相就是君道之昏也言我者詩人指淫夫非自我也

東方之月兮

曹氏曰月終魄于東

彼姝者予在我闥兮

闥音撻○傳曰闥門

內也

在我闥兮履我發兮

傳曰發行也○朱氏曰躡我行去也

臣猶月也月生於西則其明未盛月出東方亦望後

明盛之時也

東方之日二章章五句

東方未明刺無節也朝廷興居無節號令不時

詩記曰此一語

贊益見詩中有自公令之之文而妄附益之耳

挈壺氏不能掌其職焉

挈懲之反○箋

曰挈壺氏掌漏刻者夏官序云挈壺氏下士六人○曰齊哀公詩懿王時

此詩主刺哀公非刺挈壺氏也

李氏曰觀人之政者見其一失則逆料其

餘也

東方未明顛倒衣裳

倒音島

顛之倒之自公召之

箋曰自從也

羣臣之朝辨色始入今東方猶未明自可徐徐入朝

而羣臣促遽至乃顛倒其衣裳者由朝人從君所來

而召之是興居無節號令不時也

東方未晞

音希○傳曰晞明之始升○疏曰晞是日之光氣湛露匪陽不晞謂見日之光而物乾蘊

葭白露未晞亦為乾義此言東方未明無取於乾故言明之始升今日日氣所乾為晞未晞未有日之乾氣則日未出也顛倒裳衣倒之顛之自公令之令去聲○朱氏曰令猶召之也

折柳樊圃

傳曰柳柔脆之木樊藩也圃菜園也折柳以為藩圍無益於禁也

狂夫瞿瞿

音句○傳曰瞿瞿無守之貌○朱氏曰瞿瞿驚顧之貌○曹氏曰瞿瞿左右視也○今日曰蟋蟀瞿瞿言良士則驚懼之謂也此詩瞿瞿言狂夫則驚愕之謂也西漢吳王濞傳膠西王瞿然駭師古云瞿然無守之貌又檀弓曾子聞不能辰夜傳曰辰時也不夙則莫音慕

哀公興居無節詩人歸咎於司漏者以諷之謂柳柔脆之木折之以藩籬其菜園豈足恃以為內外之限

亦猶瞿瞿然無守之狂夫不能時節其夜之早晚不失之早則失之晚豈足恃以司晝夜之節然非專挈壺氏之罪也所以使之至此者誰歟杜蕢酌而飲師曠李調蕢音快乃所以規晉平也

東方未明三章章四句

南山刺襄公也

疏曰襄公諸兒僖公祿甫子

鳥獸之行

去聲

淫乎其妹

箋曰襄公之妹魯桓公夫人文姜也

大夫遇是惡作詩而去之

曰齊襄公詩莊王時

大夫去國其心蓋有大不得已者襄公之惡不可道

矣齊之臣子難言之故此詩不斥其君之惡而唯歸咎於魯桓與敝筓意同後序以雄狐為指齊襄故云鳥獸之行非也

南山崔崔

甫之平子雖反韻作唯○傳曰齊南山也崔崔高大也

雄狐綏綏

解見衛有

狐

魯道有蕩

唐之上濁○傳曰蕩平易也

齊子由歸

傳曰齊子文姜也○箋曰婦人

謂嫁曰歸

既曰歸止曷又懷止

傳曰懷思也

興也魯為望國而在齊之南故指南山以言魯謂南山崔崔然高大有雄狐綏綏然遲疑而求其匹喻魯

桓公求昏於齊也咎其後之不能制而鄙之之辭猶
氓詩怨其夫之見棄則述其初來誘己以氓之咄咄
言之也爾魯桓既求匹於我我齊國遂以文姜嫁之
適魯之道蕩然平易衆所觀瞻齊子文姜由此道而
嫁歸於魯也既嫁歸於魯矣何為又思齊乎是魯桓
不能制之而使至於此也猶敝笥惡魯桓不能防閑
之意蓋齊人不欲斥言其君之惡而歸咎於魯之辭
也辭雖歸咎於魯所以刺襄公者深矣○說者多以

前二章刺齊襄後二章刺魯桓後二章皆言取妻其
為刺魯桓明矣但以前二章為刺齊襄而後二章方
刺魯桓上下章辭意不貫兼齊人以雄狐目其君於
義有害今解一章以雄狐喻魯桓之求匹二章以屨
綏喻魯桓之得耦三章四章以蓺麻析薪喻魯桓以
正禮取文姜上下章辭意乃歸一齊人不當以雄狐
目其君以目魯君則無嫌也

葛屨五兩

屨音句兩音亮○今曰天官屨人注複下曰
鳥禪下曰屨士冠禮云夏葛屨冬皮屨禪音

丹○曹氏曰屨人辯外內命夫命婦之命屨功屨散屨
注云有纁屨黃屨白屨黑屨散屨謂去飾也所謂五兩
者纁黃白
黑散也 冠綏雙止 綏如誰反○說
魯道有蕩齊子庸

止 傳曰庸用也○朱氏
曰用此道而嫁於魯 既曰庸止曷又從止 朱氏曰從
相從也

葛屨賤而在下五兩每兩二隻言屨之有匹也冠之
纓綏貴而在上雙止言屨之有匹也屨與屨為兩綏
與綏為雙喻貴賤各有匹偶魯桓取文姜是匹敵矣
何為不能制之而使從齊襄乎此則非其偶矣

蓺麻如之何 傳曰蓺
樹也 衡從其畝 衡從音橫蹤○曹氏曰
齊民要術云種麻得良

田耕不厭熟縱橫七遍以上則麻生無葉衡從其畝蓋古法也取妻自納采以至親迎必待六禮備而後成昏夫豈苟哉故必告父取妻如之何取音娶必告父母既曰母而以蓺麻為喻也

告止曷又鞠止

鞠音菊。傳曰鞠窮也。

欲樹麻者如之何必縱橫耕治其田畝然後可以得麻欲取妻者如之何必先告於父母然後可以得妻言其事隆重而不苟合也今魯桓公之取文姜也既告而成禮矣曷為不能禁止而使之窮極其惡以至此也納之不正則容有不敢制者今魯侯既以正禮

納文姜何謂不能裁制之也○考之左傳惠公生桓公而薨桓公母仲子亦以隱二年薨桓公三年文姜乃歸魯是桓公取妻之時無父母矣此言告父母謂正禮取之耳

析薪如之何匪斧不克

傳曰克能也○曹氏曰析薪者斷取於彼以供我爨事既析則

於本根不可復合取妻者取他姓之女以供我中饋既嫁則於父母兄弟日遠取妻如之何匪

媒不得既曰得止曷又極止

析薪者必用斧亦猶取妻者必用媒文姜之惡極矣

何為使之至於此極也

南山四章章六句

甫田大夫刺襄公也無禮義而求大功不修德而求諸

侯志大心勞所以求者非其道也

曰齊襄公詩莊王時

禮義非為求功修德非為求諸侯後序為襄公言之

耳

無田甫田

上田音佃下田如字○傳曰甫大也○疏維曰無田之田墾耕也甫田之田土地也

莠驕驕

莠音酉○曰莠草似苗也解見大田○朱氏曰驕驕茂盛也○今曰驕驕桀桀皆言人力不足

芟夷不及見其蔓延長茂無如之何如有驕縱桀傲之狀

無思遠人

補傳曰遠人諸侯也

勞心

忉忉

音刀○傳曰忉忉憂勞也

比也

毛氏以為興今從朱氏

言人無得耕治大田耕大田而力

不給則莠草茂盛有驕傲之狀矣公無得思遠人思

遠人而不至則勞心忉忉然憂勞矣甫田非不可耕

遠人非不可致今言無田無思者蓋言襄公求之者

非其道耳若謂以若所為求若所欲則必不可得徒

勞其心也非謂甫田不可田遠人不可思也思遠人

謂求諸侯也

無田甫田維莠稂稂

音許○傳曰稂猶驕驕也

無思遠人勞心怛

怛旦末反○傳曰怛怛猶怵怵也

婉兮孌兮

傳曰婉孌少好貌

總角丱兮

丱音慣○傳曰總角聚兩髦也丱幼穉也○疏

曰內則云男女未冠笄者總角衿纓其總聚其髦以為兩角也衿琴之去衿猶結也○朱氏曰丱總角貌○今

曰言兩角如

未幾見兮

幾上聲

突而弁兮

突屯之入從韻○釋文曰凡卒

相見謂之突○錢氏曰忽見也○傳曰弁冠也○箋曰加冠謂成人也○疏曰周禮掌冠冕者其職謂之弁師

則弁者冠之大號

有童子婉孌然少好總聚其髮以為兩角如卅字之
形未及幾次見之突然已加冠弁猶襄公躡等而躁
求也闕黨童子將命孔子曰非求益者也欲速成者
也

甫田三章章四句

盧令

音零

刺荒也襄公好田獵畢弋

好去聲○疏曰畢以掩兔網小而柄長形

如畢星○弋解見鄭女曰雞鳴○曹氏曰言田獵以及畢弋則巨細俱舉矣古者禽獸多而人民少或為人害故包羲氏作結繩而為網罟以佃以漁本以為人除害而已後世因以寄軍政焉包音庖而不修民

事百姓苦之陳古以風焉

風音諷○曰齊襄公詩莊王時

盧令令

傳曰盧田犬也令令纓環聲○疏曰戰國策云韓國盧天下之駿犬也東郭逵海內之狡兔也

韓盧逐東郭逵山三越岡五兔極於前犬疲於後俱為田父之所獲是盧為田犬也環在犬之頷下如人之冠也

纓也其人美且仁

言古之田獵者其盧犬頷下有環為聲令令然以令令形容其環聲若親聞而喜之有聞車馬之音欣欣喜色之意非喜其田犬也以其人之有美德而且有仁恩也猶曰人好鳥亦好也襄公之為人不可道矣

國人素薄之見其田獵而陳古以風謂古之田獵者
若而人今之田獵者若而人田犬猶古也其人則非
矣其人之辭雖指古人其意乃評品襄公之為人而
深鄙惡之謂其為何等人也

盧重環

重平聲○傳曰重環子母環也
○疏曰謂大環貫一小環也

其人美且鬢

音權

○傳曰鬢好貌○
朱氏曰鬢鬢好貌

盧重鉤

音梅○傳曰一環貫二也○
疏曰一大環貫二小環也

其人美且偲

音猜
○傳

曰偲
才也

盧令三章章二句

敝笱

音苟

刺文姜也齊人惡魯桓公微弱不能防閑文姜

使至淫亂為二國患焉

曰齊桓公詩莊王時○補傳曰文姜之事齊魯之醜均也

南山敝笱意同皆歸咎於魯桓齊臣子之情也此詩

魯桓身後所作故首序直言刺文姜也按春秋文姜

以桓二年歸魯中間無如齊之事至十八年桓公會

齊侯于濼

音剝又音洛

遂與文姜如齊齊侯通於文姜使

彭生殺桓公于車詩人刺不能防閑正謂此也今詩

言齊子歸止其從如雲不言桓公同往是指桓公身

後文姜獨如齊之事自莊二年夫人姜氏會齊侯于

禚

音酌

以後不絕書

莊二年會禚四年享齊侯于祝丘五年如齊師七年會防又會穀

敝筍在梁

見邶梁皆解邶邶谷風

其魚魴鰈

毛音關鄭音昆○魴解見陳衡門今日傳以鰈

為大魚蓋據孔叢子之說衛人釣於河得鰈魚焉其大盈車遂以魴鰈及魴皆為大魚箋以魴鰈魚之易制者蓋以魴本中魚與盈車之鰈小大相遠遂以鰈為魚子諸家或從毛或從鄭今魴魴皆中魚則鰈亦中魚也衛人所釣鰈魚偶得大者以為大而詭之此詩配魴魴言之則不必便是其大盈車者入筍中者必非大魚

子歸止其從如雲

從去聲○傳曰言盛也

興也筍能制魚則魚入而不復可出今以敝筍施於魚梁其中有魴鰈之魚由筍之敝敗不能制之則入而復出喻魯桓微弱不能防制文姜故既嫁而復歸也此詩作於魯桓身後追咎前事也齊子文姜反歸於齊其從之者如雲之盛無復愧恥忌憚也

敝筍在梁其魚魴鰈

音序徐之上濁○曰魴鰈也○今曰疏引陸璣云魴似魴厚而頭大

魚之不美者故里語云網魚得魴不如啗其頭尤大而肥者徐州人謂之魴或謂之魴然今魴魴又相似而

小別魴頭小魴頭大也

齊子歸止其從如雨

如雨點之多言從之者衆猶衆多如雨也

敝筍在梁其魚唯唯

上聲。傳曰唯唯出入不制。

齊子歸止其從如

水

一魚或出或入而衆魚隨之唯然順從無復限制也
如水言從之者順猶孟子言民歸之如水之就下也

敝筍三章章四句

載驅齊人刺襄公也無禮義故盛其車服疾驅於通道

大都與文姜淫播其惡於萬民焉

曰齊襄公
詩莊王時

載驅薄薄

音朴。傳曰薄薄疾驅聲也。

簞第朱鞞

第音弗鞞苦郭反。傳曰簞方文席。

車之敝曰第。○疏曰用竹為席其文必方鞞革也。獸皮治去毛曰革。以韋鞞車也。鞞音霸。魯道有蕩

唐之齊子發夕蘇氏曰夕發於魯

言有疾驅其車之聲薄薄然以竹簞為車之第蔽又有朱色之皮革以鞞車之前後者乃魯之道路蕩然平易而齊子文姜以夕時發於魯而來齊也其來何為耶不必言及襄公而襄公之惡自見矣車聲之疾駭羣聽也車飾之美繫衆觀也道路坦夷非隱處也

無恥甚也○舊說上二句言襄公下二句言文姜一章四句之內分作二人辭意斷續碩人說衛侯夫人云翟芾以朝孔氏於彼疏云婦人乘車不露見車之前後設障以自隱蔽謂之芾則婦人之車亦言芾矣今以四句並言文姜文意方貫

四驪濟濟

驪音離濟濟之上○朱氏曰驪馬黑色也○曹氏曰所謂鐵驪也○傳曰濟濟美貌垂

轡彌彌

泥之上○傳曰彌彌衆貌○錢氏曰彌彌轡柔貌

魯道有蕩齊子豈弟

豈音凱○傳曰豈樂也弟易也

文姜車駕四馬皆是鐵驪之色濟濟然而美其六轡之垂者瀾瀾然而衆樂易安舒恬然無慚恥之色也

汶水湯湯

汶音問湯音商。曹氏曰汶水有二許氏以爲出琅邪朱虛縣東泰山東至安丘入濰桑

欽以爲出泰山萊蕪縣西南入濟班孟堅兩存其說閔子騫曰則吾必在汶上矣說者主桑欽義以爲在齊南

魯北在汶上者欲如齊也按琅邪泰山二郡皆齊地所有則汶水在齊境矣。傳曰湯湯大貌行人彭

彭

音邦。傳曰彭彭多貌。今日經中彭彭字唯此詩音邦多也自餘皆無音竝如字音棚俗併讀如邦誤

矣魯道有蕩齊子翺翔

傳曰翺翔猶彷徨也彷徨音旁羊

汶水在齊境自魯至齊必渡汶水言汶水湯湯然大

其處行人彭彭然多文姜自魯渡汶水而來其道路
蕩然平易衆庶往來觀瞻所繫而文姜翱翔彷徨無
恥甚矣○舊說謂汶水之上蓋有都焉襄公與文姜
所會蓋既以疾驅為襄公則道間必有所會之地以
意增之曰蓋有都焉其辭疑矣考春秋姜氏會齊侯
之地禚也祝丘也防也穀也無會汶之事禚音酌

汶水滔滔

音叨○傳曰滔滔流貌

行人儻儻

音標○傳曰儻儻衆貌

魯道有

蕩齊子遊遨

朱子曰猶翱翔也

載驅四章章四句

猗嗟

猗音伊

刺魯莊公也

疏曰魯莊公同桓公允子

齊人傷魯莊公有

威儀技藝然而不能以禮防閑其母失子之道人以為

齊侯之子焉

齊襄公詩莊王時○陳氏曰趙氏春秋云或曰子何以制母乎曰夫死從子通乎其

下況國君乎君者人神之主也風教之本也不能正家如正國何若莊公者哀痛以思父誠敬以事母威刑以馭下車馬僕從莫不俟命夫人徒往乎夫人之往也則公威命之不行而誠敬之不至也

文姜之事齊襄大惡也南山既歸咎於魯桓敝筭又

刺魯桓不能防閑其妻猗嗟又刺魯莊不能防閑其

母皆歸咎於他人蓋不忍斥言其君之惡者齊臣子之情也

猗嗟昌兮

傳曰猗嗟歎辭○疏曰傷歎之聲○錢氏曰昌盛壯也

頎而長兮

頎音祁○

傳曰頎長貌

抑若揚兮

錢氏曰若猶而也

美目揚兮

錢氏曰揚起也言目俊

巧

趨蹌兮

蹌音鏘○疏曰曲禮注云行而張足曰趨則趨疾行也○傳曰蹌巧趨貌

射則臧兮

箋曰臧善也

齊人傷歎此莊公之貌甚昌而盛壯矣又頎然修長矣抑而揚言進退高下不失其宜也又美目揚起矣

又巧為趨步而踰然矣又射則臧善矣威儀技藝本
是可美之事而傷歎言之有所不滿何也若曰莊公
威儀技藝之美無一欠闕所可惜者蓋有在矣文姜
之事蓋難言之首章微寓其意於猗嗟之辭而未遽
言之也

猗嗟名兮

朱氏曰名猶稱也

美目清兮

朱氏曰目清明也。錢氏曰言精神不昏也

儀既成兮

王氏曰成猶備也

終日射侯

射音石餘如字

不出正兮

正音征

箋曰正所以射於侯中者天子五正諸侯三正大夫二正士一正外皆居其侯中三分之一焉。○疏曰正者侯

中所射之處大射則張皮侯而設鵠賓射則張布侯而畫正正大如鵠三分侯廣而正居一焉侯身長一丈八尺者正方六尺侯身一丈四尺者正方四尺六寸大半寸侯身一丈者正方三尺三寸少半寸正以綵畫為之射人有五正三正二正畫五正之侯者中朱次白次蒼次黃玄居外三正者損玄黃二正者去白蒼而畫以朱綠其外之廣皆居侯中三分之一鄭言中三尺是中央之綵方二尺以外準其采之多少正之廣狹均布之以至於外畔也正與鵠大小同矣鵠乃用皮謂之正者正者正也亦鳥名齊魯之間名題肩為正正鳥之捷點者射之難中以中為俊故射取名焉大射射鵠賓射射正此言不出正兮據賓射為文也

展我甥兮

箋曰展誠也姊妹之子曰甥

又傷歎莊公名稱之美目視之清明威儀之成備當

賓射之時終日射所張之侯不出於侯中之正展誠也為我齊侯之甥又言其為齊侯之子故此說為拒外議之辭譏之深矣

猗嗟變兮

傳曰變壯好貌

清揚婉兮

朱氏曰清目之美揚眉之美○考見鄘君子偕老

舞則選兮

選去聲○箋曰選者謂於倫等最上○今曰選猶精也

射則貫兮

今口貫穿

也如貫革之射善射者中物而有力故能貫之射不穿札言不善射也舊以貫為中與上章重複矣四矢

反兮

箋曰反復也

以禦亂兮

詩記曰此詩嗟歎再三而莊公所大闕者不言可見矣

又傷歎莊公變然壯好其目清明而其眉揚起婉然

而好舞則甚精射則穿貫其革每射四矢皆復其故處射藝之精如此尚足以禦禍亂乃不能防閑其母乎莊公弓矢之精觀其以金僕姑射南宮長萬則可見矣始槩言其射之臧下乃詳言其所以為臧不出正兮言其中也射則貫兮言其中而有力也四矢反兮言其再射又中前處也三者所以為臧也○變風之體意在言外有全篇首尾皆託之他辭乍讀之茫然不覺所謂但中間冷下一二語自然使人默會如

此詩極言其人容貌威儀技藝之美而以歎息之辭發之是其人所不足者必有在於容貌威儀技藝之外矣方此時採得於齊未有序說不知所刺何人所言何事中間有展我甥兮一句只一甥字便見得是刺魯莊公只一展字便見得是人以魯莊為齊侯之子詩人設為諱護之辭以譏之讀者既默會其意乃再諷詠之方見得自猗嗟而下句句稱美處節節是歎息不滿處辭不急迫而意深切矣

猗嗟三章章六句

詩緝卷九